



**ODLUKA  
O PROGLAŠENJU MANIFESTACIJA  
IZ OBLASTI PRIVREDE, LOKALNOG POSLOVANJA I RAZVOJA GRADA  
OD POSEBNOG INTERESA ZA GRAD SARAJEVO  
(prijedlog)**

**Predlagač: Gradonačelnik  
Obrađivač: Gradska služba za lokalnu  
samoupravu i razvoj grada**

**Sarajevo, novembar 2018. godine**



Na osnovu člana 26. stav 1. tačka 2. Statuta Grada Sarajeva ("Službene novine Kantona Sarajevo", broj: 34/08-prečišćeni tekst), Gradsko vijeće Grada Sarajeva na sjednici od \_\_. \_\_. 2018. godine donosi:

(prijedlog)

**ODLUKU  
O PROGLAŠENJU MANIFESTACIJA  
IZ OBLASTI PRIVREDE, LOKALNOG POSLOVANJA I RAZVOJA GRADA  
OD POSEBNOG INTERESA ZA GRAD SARAJEVO**

**I OPĆE ODREDBE**

**Član 1.**

Ovom Odlukom utvrđuju se manifestacije od posebnog interesa za Grad Sarajevo iz oblasti privrede, lokalnog poslovanja i razvoja Grada (u daljem tekstu: Manifestacije).

**Član 2.**

Manifestacije iz člana 1. Odluke su:

1. Sarajevo Business Forum,
2. Sarajevo Unlimited,
3. Sarajevo Holiday Market,
4. Sarajevski festival turizma.

**II KRITERIJI I NAČIN SUFINANSIRANJA MANIFESTACIJA**

**Član 3.**

Manifestacije iz člana 2. ove Odluke, u zavisnosti od zahtjeva organizatora manifestacija, a u skladu sa finansijskim mogućnostima Grada Sarajeva, će se finansirati iz sredstava budžeta Grada Sarajeva sa pozicije: Primjena Odluke o sufinansiranju manifestacija iz oblasti privrede, lokalnog poslovanja i razvoja Grada od posebnog značaja za Grad Sarajevo.

**Član 4.**

Finansiranje Manifestacija iz člana 2. ove Odluke vršit će se u skladu sa općim i posebnim kriterijima i to:

**a) Opći kriteriji**

1. registracija podnosioca zahtjeva za finansiranje programa manifestacije (ne starije od šest mjeseci);
2. identifikacioni broj i broj transakcijskog računa u poslovnoj banci; (original ili ovjerena fotokopija),
3. prijedlog programa manifestacije, sa specifikacijom troškova neophodnih za realizaciju;
4. obezbjeđenje tehničkih, ljudskih i materijalnih uslova neophodnih za realizaciju planiranih aktivnosti;
5. finansijski izvještaj za prethodnu godinu, za one korisnike koji su dobili finansijska sredstva od Grada Sarajeva.

**b) Posebni kriteriji**

- a) kvalitet i značaj ponuđenih programa,
- b) kontinuitet ponuđenih programa,
- c) stepen doprinosa afirmaciji Grada Sarajeva kao poželjne lokacije za razvoj privrede, lokalnog poslovanja i turizma
- d) uticaj ponuđenih privrednih manifestacija na širu društvenu zajednicu,
- e) uticaj ponuđenih privrednih manifestacija na međunarodnu promociju Grada Sarajeva,
- f) uticaj ponuđenih privrednih manifestacija na razvoj turizma u gradu Sarajevu i BiH,

- g) privredne manifestacije koje promoviraju Grad Sarajevo kao regionalni privredni centar mjesto promocije inovativnih pristupa privrednog i tehnološkog razvoja, kao i nova šansa u razvoju lokalnog poslovanja usmjerenog na afirmaciju populacije mladih.

#### **Član 5.**

Organizatori Manifestacija su dužni podnijeti zahtjev za sufinansiranje manifestacije, gradonačelniku/ci Grada Sarajeva, putem Gradske službe za lokalnu samoupravu i razvoj Grada (u daljem tekstu: Služba), sa obrazloženim programom, planiranom finansijskim konstrukcijom programa tj. manifestacije, kao i kompletnom dokumentacijom kojom se dokazuje ispunjenje općih i posebnih kriterija i to najkasnije do 30. septembra tekuće godine, kako bi se mogla planirati sredstva u budžetu Grada Sarajeva za narednu godinu.

#### **Član 6.**

Programe iz člana 5. ove Odluke, Služba procjenjuje sa stanovišta značaja za Grad Sarajevo, odnosno njegovog posebnog interesa, u skladu sa kriterijima utvrđenim Odlukom, te svoje stavove i stručno mišljenje dostavlja gradonačelniku/ci Grada Sarajeva.

Služba, u skladu sa stavom 1. ovog člana, razmatra predložene programe Manifestacija shodno valjanosti, značaju i kvalitetu istih, predlaže visinu iznosa sredstava neophodnih za realizaciju, te svoje stručno mišljenje, dostavlja gradonačelniku/ci Grada Sarajeva na dalji postupak.

Konačnu Odluku o sufinansiranju Manifestacija donosi Gradsko vijeće Grada Sarajeva.

#### **Član 7.**

Grad Sarajevo, kao sufinansijer manifestacije ima pravo:

- uvida i aktivnog učešća prilikom utvrđivanja programskih opredjeljenja manifestacije;
- na imenovanje jednog člana u Organizacioni odbor manifestacije.

#### **Član 8.**

Organizatori manifestacije su dužni po završetku manifestacije, dostaviti gradonačelniku/ci Grada Sarajeva izvještaj o namjenskom utrošku sredstava, shodno Odluci o izvršavanju Budžeta Grada Sarajeva.

Ostala prava i obaveze Grada Sarajeva, utvrdit će se posebnim ugovorom gradonačelnika/ce Grada Sarajeva sa organizatorima Manifestacija.

### **III PRELAZNE I ZAVRŠNE ODREDBE**

#### **Član 9.**

Nadzor nad provedbom ove Odluke vrši gradonačelnik/ca Grada Sarajeva, putem Službe. Gradsko vijeće Grada Sarajeva, prilikom utvrđivanja budžeta Grada Sarajeva za narednu godinu vrši periodično revidiranje opravdanosti finansiranja manifestacija iz člana 2. ove Odluke.

#### **Član 10.**

Izmjene i dopune Odluke, vrše se na način i po postupku za njeno donošenje.

#### **Član 11.**

Ova Odluka stupa na snagu narednog dana od dana objavljivanja u «Službenim novinama Kantona Sarajevo».

**PREDSJEDAVAJUĆI GRADSKOG VIJEĆA  
GRADA SARAJEVA**

**Igor dr. Gavrić**

**Broj:**

**Sarajevo, \_\_. \_\_. 2018. godine**

## OBRAZLOŽENJE

### *PRAVNI OSNOV*

Pravni osnov za donošenje Odluke sadržan je u članu 26. stav 1. tačka 2. Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

### *RAZLOZI DONOŠENJA*

Imajući u vidu činjenicu da Grad Sarajevo već tradicionalno doprinosi organizaciji manifestacija iz oblasti privrede, lokalnog poslovanja i razvoja grada i to pružanjem finansijske podrške iz sredstava budžeta Grada Sarajeva, to se ukazala potreba za proglašenjem manifestacija od posebnog interesa za Grad Sarajevo iz ovih oblasti djelovanja, a koje se održavaju na području grada Sarajeva i doprinose kako razvoju grada, tako i afirmaciji Sarajeva i Bosne i Hercegovine u regiji i inostranstvu uopšte.

### *OBRAZLOŽENJE PREDLOŽENIH RJEŠENJA*

Članom 1. i 2. Odluke utvrđuje se koje su to manifestacije od posebnog interesa za Grad Sarajevo iz oblasti privrede, lokalnog poslovanja i razvoja Grada .

Članom 3. propisuje se sa koje pozicije će se sufinansirati Manifestacije.

Članom 4. propisuju se opći i posebni kriteriji za sufinansiranje Manifestacija.

Članom 5. propisuje se obaveza organizatora manifestacije.

Članom 6. propisuje se postupak i način rada Službe i uloga Gradskog vijeća u konačnom odlučivanju.

Članom 7. propisuje se pravo za Grad Sarajevo da kao sufinansijer manifestacije ima uvid i aktivno učešće prilikom utvrđivanja programskih opredjeljenja Manifestacija i na imenovanje jednog člana u Organizacioni odbor manifestacije.

Članom 8. propisuje se obaveza organizatora manifestacije za dostavljanje izvještaja o namjenskom utrošku sredstava, kao i da se ostala prava i obaveze utvrđuju zaključenjem posebnog ugovora gradonačelnika sa organizatorom manifestacije.

Članom 9. propisuje se vršenje nadzora nad provođenjem Odluke, te obaveza Gradskog vijeća da svake godine vrši provjeru opravdanosti sufinansiranja utvrđenih Manifestacija.

Članom 10., i 11. propisuju se način izmjena i dopuna Odluke, te stupanje na snagu Odluke.

### *FINANSIJSKA SREDSTVA*

Finansijska sredstva za realizaciju ove Odluke biće obezbijedena u Budžetu Grada Sarajeva.